

03. 奇巧仙丹

印度有一位國王今年已經五十歲矣，今仔日真正足歡喜，因為伊等誠久，才等著第一个囡仔出世，是一个查某囝。小公主生做膨皮、膨皮誠古錐，逐家看著攏真歡喜。國王特別愛這個小公主，日嘛看，暝嘛看，會使講逐工顧牢牢，無離半步。看小公主一點仔、一點仔大漢，國王心內想講：「公主遮爾仔細漢，啥物時陣才會大漢？」就按呢，國王共皇宮的醫生揣來。

國王問：「你敢有啥物藥仔，予公主食了，會當明仔載就大漢？」皇宮醫生回答國王：「當然有矣！有一種仙丹，會使予人食落喉，隔轉工隨大漢，毋過這款仙丹無好做，這馬閣欠幾若種藥草，我愛去較遠的所在走揣。」國王聽著，就趕緊催這位醫生出門。

佇咧起行進前，皇宮醫生雄雄想著，閣有誠要緊的代誌猶未共國王講，伊認真交代：「自今仔日起，到我成功提仙丹返來進前，請予小公主躡佇皇宮外口，國王千萬毋通去看小公主，若無，就算予我揣著十粒仙丹的草藥，嘛無路用。」聽著按呢，無論國王有偌毋甘古錐的小公主，

為著這粒仙丹，為著欲予小公主趕緊大漢，伊只好答應醫生，共小公主送去皇宮外口躡。毋但按呢，自醫生出門走揣草藥開始，國王真正攏無去看小公主，遵守醫生所講的條件，向望 (ng-bāng) 醫生仙丹做好，趕緊轉來。

一冬、兩冬、三冬，想袂到十二年真緊就按呢過去矣，醫生總算共仙丹提轉來，伊先揣著小公主，予伊食落，隔轉工才炁小公主做伙去見國王。國王看著面頭前嬌喘噹 (suí-tang-tang) 的小公主，心內真歡喜，呵咾 (o-ló) 醫生真勢 (gâu)，呵咾甲會觸舌，講伊是真正有才調，會當做出這款奇巧的仙丹！

為著答謝辛苦的醫生，國王賜予伊真濟真珠瑪瑙。邊仔的大臣攏文文仔笑，佇心內笑講國王誠好騙，無論佗一个囡仔，過十二冬攏嘛會大漢，哪會是啥物仙丹厲害。

各位朋友啊！逐家感覺，是醫生的奇巧仙丹厲害，抑是時間較厲害呢？